


# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM


Balemeaksat ke 2024

18<sup>e</sup> otuk


Kotava, tela tamefa golerava  
Va ina kosmac !!








IZVA IS ARAYA



# LOUIS XVI



## Louis XVI gazik ke Franca

---

1. Gaara va gazik
2. Louis XVI is gazafa eba
3. Gazik ke « Afiugal »
4. Louis XVI is Amerika
5. Gogol is fabdura
6. Bowera ke gazik
7. Gadik ke sane
8. Louis XVI is Paris
9. Bemuaƒ gazik
10. Gazik yates
11. Gazik a gazaxo
12. Va ervo wideyik !!
13. Gazik koe flint
14. Jiz az xonuka
15. Ugalay
16. Kotgrupaf korobik
17. Sareon gu Louis XVI
18. Ugalda ke lane sare
19. Icde Louis XVI



# Gaara va gazik

**1754**

**Koblira ke Louis XVI**



**Louis XVI ba san-barda**

Bate sardikye dem faltaf iteem klokayar da co di tiyir gazikany. Titi gazugal kaliyir : « Co zo djumalbá ».



**Louis is berikyeem**

Toloye lojotafe berikye ke Louis XVI lickuyud. Va in jontikviele plukeyed ise va bat vazaf is strokaf rumeik deasegayad.

**B**ak 1769, diref Louis XVI klaaf gu 15 tanda gruraziar. Bak Afiugal, lotan trakuyur da kliwura tiyir ana rotuca, dace icde gazik. Tir vey-nazbeikye ke Louis XV. Maria Josepha von Sachsen gadikya va tavera va izva is alka volmiv getcar isen gadikye va englava taver. Dalaf tavesik tir ke Sorbonne kotla. Numen Louis XVI tiyir tel logrupeaf gazik ke Franca nume va latinavafa neva isu englavafa grubeliyir. Voxen rumeugal ke Louis XVI tiyir kranaves ; tison barsandaf, vanpir gadiskik ; toloye berikye tid lickafe isen va nik me dikir. Va ugal koe Bellevue berma koe tawaday gitiskir. Koe aalxo okollakir ise va tcabanesikafa dosita albar. Va tcabanera skeson di karolar. Cava ke bane sare jupayar da sersaf nazbeik warzon zo gaayar. Dem abica stutera isu tivuranya, vox kan kotavera va favlafa eba isu ela. Louis va exavura lodam aboyafa fipta abdualbar. Va taya grudarkasaber ise va vema ke Versailles yambon liwotar. Ta ludotaf ind tuobliawer numaze va Gamain ludotasik tudositar. Nobara va kijasik is nyofara koe glotcaxe lodam vefara do aboyik va in dulapad. Ton figafa laniga is ontinafa puda is dem mederaf talgeem is faltaf bendaf iteem, tiva ke diref gazik tir vazafa is strokamafa.

*Bak 1769, diref Louis XVI klaaf gu 15 tanda gruraziar. Bak Afiugal, cugtan trakuyud da kliwura tiyir ana rotuca, dace icde gazik.*







# Louis XVI is gazafa eba

**1774**

Louis XVI va uskej ke Franca mofir.



Louis XVI va patiafa neva gedir.

Deolaca ke awalk ( tel ke toloye taneanazba-lafe berikye ) va uskej ke Franca pu Louis XVI ba 10-e ke alubeaksat ke 1774 vanzilid. Bali jupar da in vanpir gazik ba leon tol-sanda, voxegu bati fli me al zo abdiegar. Gu eldaf pirdotgan Louis XV daref gazik abicviele zo ganeyer voxega locoba icde razopa is kocopa lodam gaderopa raveyer. Awalkera ke veygadikye va in skalteper kire va sane buzegase nope zida gilder.

Vielu Louis vanpir gazik, pune vetcoyeson voxemeskeuson ebur. Va guazikye wetce dalaf eldik narar. Va bowesi rali ke Louis XIV abdigadik me dir. Kevoke, va dro ke arsayeem is pinta ke vieleafa blira suzdar. Va opelaf vageeem gidiskir. Va arbeyena rigelaxa dimempar ise va patiafa neva icde intaf ilkaf lustereem gedir. Va intaf segeem ko tcabaneraf kid stragar !

Voxega koncoba zolonon gogorar, pune gazik zo tokter. Va ponsafa anda dir nume va kuranuca pu eldik me lajukoaykar. Va kottan rodaxar ise va yona twa ke pilkovik meklabuson fenkur. Mibuesison va metan lasubower. Bal zolonafa tanara dace dile komoder.

*Gazik badenyas koe Reims ba 11-e ke teveaksat ke 1775 zo tubaerdar.*







# Gazik ke « Afiugal »

**Teveaksat ke 1774**  
Richard kurmik  
va gazik fostorar.

**1746-1780 :**

Sanegara va *Xadola* ekwe  
*Oves ravlemak dem ova is*  
*yamba is exava.*

**1774**

12-e ke alubeaksat :  
kotawara va Louis XV  
gazik. Louis XVI vanpir  
gazik.

**1775**

11-e ke teveaksat :  
tubaerdara va Louis XVI  
gazik.

**1776**

14-e ke pereaksat. Daktera  
va volruptesuca ke  
amerikaf boniaxoem.

**1776**

Benjamin Franklin va  
pomara ko Franca aneyar.

**1778-1783**

Cenesa geja ke Franca  
kev Engla.

**1783**

Lavoisier kosmar da lava  
sotir tiexa.

Neken Louis XVI tir ayik ke intaf ugal. Al wir da veygadikye nope brinkakola mulufteyer, azen arti abic aksat radimi tugazawera, sotceson va ma pu kurmik fostoratas, linular takrelaf. Banviele varaf Paris va direfa muluftera ke bat tolsandaf gazik folir. Dirnuson va witafa selaropa, Louis XVI over nume gan bata akola di zo umber.

Va *Xadola* gibelir, i va neva tualiasa va opa is ova. Remi yon kotraf mielcek, va koyara is vestasik gipulvir ; gan liwotak zo sker. Va vawa ke englaf totasik isu francaf koe sumefa bira moe liwot sokuvar.

Bak geja kev Engla ( 1778-1783 ), benplekuyur da tota ke Cook redakik tu englaf vestasik, gan intaf toteem me di dilfuyur.


Louis XVI va rieta ke *Afiugal* dotrakur nume va gindesa swava koe gazaxo rewar. Nover da *Protestant* alkusik va pilkaf wideytaf vertok dem koblira is awalkera di dadir. Va tan eldik ta konendara va Yud saneik bristur. Ison va nakera va lanzanik beomar. Djumer da gomi-lasik zo pursar volse zo eloder.

*Louis XVI kev brinkakola zo fostorar. Bata akola tiyir awalkolafa abdi kosmara va fostora.*

**Decemda ke Afiugal :**

Bat yolt tir tel ke XVIII-eafa decemda kiren ina tiyir ke lo trakopik zilis va ana yorda pu ova.







# Louis XVI is Amerika

**1778**

**Benjamin Franklin koe Versailles**



**George Washington**

Bak 1789 yolton gu amerikafe sane, Washington vanpiyir taneaf taneatisik ke Tanarasokeem ke Amerika. Kali 1796 boweyer.

**Boniaxo :**

Tawavo boniano is saveno gan europik radimi Gijafa Kosmara.

**Gejatoteem :**

Birafa ervolia dem gejatota.

**M**ali konaka decemda, kevluca va Franca is Engla kevrur. Gazik ke Engla bal doaliera kevrur Franca al tiyid fikuntaf nume gu cug taway isu digiks koe Amerika al azregeyer.


Englafo **boniexo** ke Lentefa Amerika va volruptesuca bak 1776 etimad voxe tid axarsafo ta acagira va englafa ervolia.

Francaf kuranik jotaf is bitonaf ta pomara va jotafa Amerika titisa taway ke nuyuca vilted. Louis XVI va staksera va francaf **gejatoteem** ta lyumara va englaf milk isu tota naler. Va amerindiik yaler ise va erba bas xollandaf omeltik beitur ise va liza is tegi jupanyar eke francaf sayakik stan gan La Fayette va sizuntasa cenera wad.

Bak 1783, Amerika vanpir volruptesa soka. Gazik ke Franca va koblira ke tele logijafe sokasane ke tamava al nover. Amerika vanpir nuyafa is gaziskafa patecta isen taneaf taneatisik di tir **George Washington**. Tcatey va Paris ta cenera va Engla koafid. Louis XVI gu « gadik ke nuyuca » en zo torigir, i gu gazik firviyis va kaluca ke nuyafa blira pu sane.

*Radimida Benjamin Franklin koe Versailles zo emudeyer aze zo pomayar, pune beliyir :« Gazik koe bata bifa isu anyona sedme jin tir tel logijaf askisik va kalik tigus koe tamava. »*







# Gogol ok fabdura

**1779**

**Nuyuca koe indxoem ke gazik.**

**1774-1776 :**

Turgot, fabdus eldik.

**1775**

Geja ke regelta  
( aelakola is tcazuca ).

**1777**

Journal de Paris, taneafa  
francafa vieleafa fela.

**1785**

Calonne eldik va koburera  
va femusiko ke Engla rictar.

**1786**

Francenglafa bioga icde  
kazara.

**1787**

Louis XVI va wideyaf  
vertok ke Protestant  
alkikeem rictar.

**Balemoyu oluafu amu :**

Batcoba sugdalar da veyga-  
dikeem ( vas 4 ) ke korik tiyir  
oluaf.

**Levetirik :**


Tawadayik tis ke jiomaik is  
midus va inaf taway. Va kono-  
leks me roremziliyir meie koe  
jiz rovutayar.

**X**abe, francafi gazaroti tir savsaf drajebayas foalk. Gazik ke Franca va savsaf orpeem meviele al djuvilad ise vogad da va rigotaf mweem ke soka di malaskid. Franca va jontika izvafa decemda dickir isen gazaroti tir metanafi. Kare winka is gola, sabe is koayka is mwa tid amidafa. Dem 27 celemoy irubasik, Franca nutir « Sinia ke Europa ». Vas gulik gluyedan gu decitoy wazdelam vektar. Fiste gu jontika savsafa is mefakafa mwa co zo grifuner. Proyaf eldik pirdad da gazik va kaza is iara va muka di tunuyar. Djumed da francikeem di zo miltaf icde koayka isen kottan va pakack di doder. Voxen savsaf mweem va lokiewaf rundak dene uja is ervolia is malyerot pu oluikem ickriler. Kot tujradik tir oluaf ! Kot moef fayik tir oluaf gu balemoyu amu. Oluikem folkir vey fortey vamoef gu kotar francik numen nope bata vamoeuca, va gogoleem djukubelundar.

Louis XVI va vonafa takra dir : dene intaf indxoem va nuyuca pu levetirikeem kserar voxen gazik va oluikem me djutuomar. Va adrafa fabdura vewar. Acum « towasira » va gazaxo ke Franca tuvolrotisawer.

*Ba 08 ke anyusteaksat ke 1779, levetirik va tunera va « levetiruca » kotgruped.*







# Bowera ke gazik

**07/06/1778**

Viel dem mikiya



Turgot



Necker

## Jadif graltambik

Erbabeitasik abdigas va itaya ke merontifa koayka pu gazik az dimerbas pu int tove sane.

Titi gazugal, Louis XVI va Turgot wetce dalaf eldik narar. Bat gedisik va Limousin winka va meja ke sane is inyona ekena memalyaca grupecker. Turgot laner da gazaxo ke Franca nope fabdura loeke ware tugijaweter. Bak inafa bowera, **jadif graltambik** zo kimad nume va sane me xuvarsad isen kametca dem denta nuyon exuled.

Voxen sane va batyona fabdura dwir nume va « geja ke regelta » ( 1775 ) tuyer. Erbabeitasik kev Turgot va int tixad ise van gazik sopud. Louis XVI va eldik me nendar aze taruler. Darpe tanda az tanda, gazik va bowera va sokaf arienteem mea dulaper.

Yastikeem va lanyon pirdasik koaykar. Tere gazik va tujradik wetce dalaf eldik koflir, i va lan mefolixes tujradik ! Ostik nederlandaf omeltik dined da Franca va erba zanudasa va gejura koe Amerika di dimdoder. Voxen aboyikeem jotikdroe dun exuler isen jwa tir vlardafa. Poltinera dratcer. Louis XVI trakur da koflira va Necker omeltik wetce eldik va jwa tir kiewaca. Voxen bantan silukon dun erbabeitur nume va Franca loote kobozar.

*Koe Grenoble, sayakik va sane viltad. Irubasik moe kepaita gelbed lizu va sin kan mikiya aorad.*







# Gadik ke sane

**1789**

Artowara



Savsaf francaf winkeem



**Baroy veem** : oluikeem is gertikeem is bareaf veem.

**Bastille :**

Bata savsafa ralma vegeduyuna bak XV-eafa decemda va sokaf flint zanudar.


**Ba** 5 ke alubeaksat ke 1789, Louis XVI va dewitca fenkusa va Jadif Sokeem koe Versailles tiyar. Krinanik libuyun gan kota **winka** tid pokolepes viele va gazik balemon kalis va « kaluca » ravlem gilded.

Kas Louis XVI fu vanpir « Gadik ke sane » pokolen gan kottan ? Me kire gazik va fabdurama anton djumer nume va tadle ke francikeem ton **baroy veem** wan nendar : oluikeem is gertikeem is bareaf veem. Oluikeem is gertikeem tid gogolkiraf. Bareaf veem tir vas 98 % ke francikeem gogoliskaf is verkas va koayka. Ba 17 ke teveaksat ke 1789, krinanikeem ke bareaf veem dakter da va varaf vedey kaatoer nume vanpir Vedeyafa Koka. Etimar da va warzafa mwa koe gazaxo ke Franca askitir. Louis XVI va bat betareem me naler. Va Necker eldik taruler ise va yona lokiewafa vertega ke gazafa ervolia volmiv rozar.

Parisik gildad da bata sabega va fabdura djukutated. Ba 14 ke pereaksat ke 1789, sin va **Bastille** ralma vangid ise va wideyikafa ervolia tazukad. To Artowara tir !

*Ba viel ke fenkura va Jadif Sokeem, gazik va int edjiyir azen oluikeem. Bareaf veem milinde askiyir. Weyonason va miltuca do oluikeem, Louis XVI nujididuleyer nume va edji deswayar. Krinanikeem milinde askiyir.*







# Louis XVI is Paris

**26/08/1789**

**Dakteks va rokeem ke ayik**



**Louison Chabry** : Sanperdafa balumasa dodelikya, tit Louis XVI badenyar aze kalir da sane koe Paris aeler !

**V**oxen bifa ke Artowara va skapa relatced, i va skapa ixam dratcena gan fentaf idulugaltum is jontik tizaf xeftoccek blokayas va warolaks. Bak idulugal ke 1789, sinkafa enja va Paris is Franca dratcer. Meviele mali tanoya decemda, beg tiyir liote tcazaf. Remi idulugal, tawadayik exud ise va lamone ik waba ke oluikem burmed. Bak mielcek ke 4-e ke anyusteaksat ke 1789, sulason va gogoleem ke oluikem, Vedeyafa Koka va jimevafa vertuma tenar. Bak 26 anyusteaksat ke 1789, Dakteks va Rokeem ke Ayik is Wideyik va miltuca ke ayikeem exoner. Voxen Louis XVI va bat mweem kotron betas va gazaxo iskemaso gan abdigadik me kuranir. Vol naler da mwa ke sane co tigr vamoeroka ke gazik. Bak saneaksat ke 1789, lani tari dem parisikya diskisa va intockem van Versailles mallanir. Remi tol-sanoye decitmetre leve aliesa muvara. Gazik va lantanya emuder. Sina kalid da aeled isen aelakola va Paris dratcer. Arti konak bartiv, La Fayette jadiwik do milk dem parisik glastik artlakir. Gazik zo ivamudapar nume vangruper da va bati tari isu ervolia goradimlakir. Ba 6-e ke saneaksat ke 1789, va Versailles do yasikeem bulur aze va Paris titisa naboxa kolanir.

*Ba 17-e ke pereaksat ke 1789, Louis XVI ko Paris lakir ; va barksevaf erbilok ben edji plekur. Sane va daava iegar. Trakur da gazik va nuyuca koe Franca fu dimplekur milinde va inafa exonera koe Amerika al pomayar.*








# Bemuaf gazik

**14/07/1790**

Jora ke Galda



Barksevaf erbilok

**1789 :**

**17-e ke teveaksat :** Koka ke Bareafa Soka etimar da tir Vedeyafa Koka. Artowara tozuwer.

**14-e ke pereaksat :** Narira va Bastille ralma.

**17-e ke pereaksat :** Louis XVI ko Paris lakir ise va barksevaf erbilok pluur.

**26-e ke anyusteaksat :** Dakteks va Rokeem ke Ayik is Wideyik.

**6-e ke saneaksat :** Gazik is yasa ko Paris zo dimstad.

**1790 :**

**14-e ke pereaksat :** Jora ke Galda koe Paris.

Lia bifa va francikeem vudesid. Koe widava, glastik va listaf sayakikaf ugol lusted ise va yona ervoliama tazukad. Tawadayik dun zavzad elogan ise va lea koayka ware imaxud.

Francik djukutid sane dem berikeem isen koe lana winka azu ara va intafa tanara etimad. Bata tanara va yolt vas galda narad.

Ta ilanuk ke narira va Bastille ralma, francikeem va jorapa koe Paris askitid. Kota widava, kota winka va nilt dem baroya kseva ( falte is batake is kere ) askedar isen galdik van Paris toz lanid.

Jora ke Galda ba 14-e ke pereaksat ke 1790 va karnizeem wal winkeem sular ise va Franca is francikeem tutanar. Louis XVI va jora djumeyenon taneatir voxe vangruper da co zo rofiander. Bal fipta, gu Maria Antonia kurenik zo griuziar. Gazikya va Artowara loloon ilkader ise koe Tuileries berma nope vuda skotcer. Inafa antafa pokolera tir pomara ke Leopold II berikye tu gindik koe Wien koe Ostera. Gazik is yasa va yatera fure modovadad nume va yon gazik ke Europa co kevlakitid, i va kosayik levlikes va artazukara va Franca.

*Fiptason va taneaf ilanuk ke narira va Bastille ralma, is tcalason va sintafa tanara, francik ke winkeem va jorara al gorad. Louis XVI gazik va bata jora ke Galda tcoker*







# Gazik yates

**20/06/1791**

Louis XVI va Paris bulur



**Hussard okollakisik**

Sayakik ke bagafa okolervolia

Koe Tuileries berma, Louis XVI va stolenikafa darsaca ixam al nariyir. Koe bat « moavayaf flint », va twa preytason maneyer ise va birgafa lupaxa koolaniyir. Ba Paques kapa, zo tatceyer da ko berma ke Saint-Cloud rolakiyir. Re en djukuyater. Kore trumon zo eninter, pune gazik efuyun ton kwik, ba 20-e ke teveaksat ke 1791 ba miamiel, do yasa va Paris lajubulur. Remi vielcek lizukeduyuno diremuko van Lorraine gola vultur. Ba kote warzafe exuleyene decitmetre, pokolera va katrasira va nuyuca tugijawer. Gindafa yasa va **Hussard** okollakisiktum pok jowa al kakevetcar, i va sayakik gofuzodetes kal tawavo ke germanafo gindaxo. Voxen tan krafol ke blafotafo diremuko empawer isen stasik va rotaf okol koe ledungxe anton trasid. Ba nivaf bartiv ke kakevetca, **Hussard** okollakisik va metan artlakis wid numen folid da gazik va yates azed al arevlar. Miledje Louis XVI aulon koyar : do korik kene vawa meklabuson pulvir ise va koyase puve katrasir. Voxen koe lane ledungxe, Drouet gedisik va gazik kagrupey numaze va dotokilik ke Varennes kevwalzer. Ba 21-e ke teveaksat, Louis XVI zo soper aze ko Paris zo dimstar. Mevielu gazik va vaduluca ke intafe sane di katrasir.

*Gazik kagrupeyen ko Paris gan tari zo dimstar lize emudera di tir fentunafa.*







# Gazik a gazaxo

**06/1791-04/1792**

Ugal dem skujera



Maria Antonia

**1791 :**

**21-e ke teveaksat :** otcera ke gazik az sopera koe Varennes.

**25-e ke teveaksat :**

dimlapira ke gazik ko Paris.

14-e ke lardeaksat : gazik va malaskira va Tadlemwa vruzar.

**1792**

**20-e ke balemeaksat :**

Franca va germanaf gindik kogejar.

**25-e ke balemeaksat :**

Rouget de Lisle va « Marseillaise » dank koe Strasbourg buner.

**20-e ke teveaksat :** gazik gu keraf gom va int divatcetakar.

**11-e ke pereaksat :** guga keunison zo etimar.

Viele gazik ko Paris dimlapir, pune vangruper eke sane va Artowara kralir. Bak inafa otcera kal Varennes, va yon diliodaf korik al wir, i va korik elvaf gu poura va artowas rieteem.

Numen antafa pokolera ke Louis XVI tir da divef gazik tunuyatson di greled. Maria Antonia kurenikya kioxafa gu vuda is zida, bam plataer da in va lugavaca di torler. Lavion gazikye is gazikya va Artowara kevnaled voxe enwe cugeke lasurodjesid : Louis XVI va yon skujesik maldoder ise va birgotafa daalara do divef nafalik is kevartowasik sopur.

Do Gamain ludotiasik, va azilafa rastoka kadime valca ke lan plor koe Tuileries berma birgapon vegedur. Banliz va rotplekusa eluxaxa preyutar.

Va lodilamsiskes artowasik koldar enide Franca va germanaf gindik di kogejar. Ba 20-e ke balemeaksat ke 1792, va geja yolton gu Franca etimar. Louis XVI enwe pokoler da francaf ervolieem va ervolia ke Ostera is Preussa abicedje acagitir numazen in zo tunuyatar.

*Bata azakedayana rastoka ( dure kruldesa ) is intaf birgaf valdigeem titid benelafa vrinasa olkotca remi jiz va Louis XVI.*








# Va ervo wideyik !!

**10/08/1792**

Dilfura va Tuilleries  
berma



**Louis XVI gelbes koe Vedey-  
afa Koka**

Louis XVI is intafa yasa koe  
sutelasikafa bonta tigid..

Louis XVI va rojura va Paris me djusanegar. Parisik kivad da ralma rojusa va lentefa is ronefa jowa kalion fu zo zonosted. Cug fayik me tid septaf isen relmera zo craked.

Louis XVI leleon zo albar ; dun zo lutsagar, zo poar da poron gu sane gonulir.

Kotlizu koe Franca, baltanikaf milk yoltkiraf gu « *galdanik* » ko Paris artlanid. Milk ke Brest is Marseille tid tel lodelvaf. Galdanik va warzafa danka al raved, i va « *Marseillaise* » gildena koe vawila ke Paris. Divefa ervolia va kelo vanlanid isen kottan trakur da Maria Antonia gazikya va birgeem relmer : va azed ta rojura va francaf ervolieem pu preussaf ik osteraf jadiwik al dear.

Tokdume va relmese gazikye isu gazikya co govidet ? ~ sane ke Paris nuer. Ba 10-e ke anyusteaksat ke 1792, galdanik is milk ke yona revava ke Paris va Tuilleries berma dilfud. Rojusikeem va gazik zo soped oke zo staked. Gazik zo divflir aze ba 13-e ke anyusteaksat do intafa yasa ko Temple flint zo star.

*Tuilleries berma gan yona winkafa galdanikafa lospa is yon Sans-Culotte artowasik ke parisafa revava zo dilfur. Louis XVI ko Vedeyafa Koka gelber. Koe sutelasikafa bonta zo kosur. Tici doaliera, Louis XVI mea tir gazik numaze vanpir stolenik ke Vedey.*







# Gazik koe flint

**20/09/1792**

Valmy cenera



**Lubin, iegasik ke fela**

gan niktum ke gazik ta iegara va warzot pu Louis XVI zo doden. Inafa puda tir popofa eke gazik va bifeem zo kogrupenar. Gu surtera va preussafa ervolia ko Valmy zo givar nime vangrupe da me di zo tunuyar.

**G**azik is intafa yasa koe Temple zo koflintad, koe krijaf vegeduks ke Mialukugal. Fentafa is gutoiskafa olkoba dem rebava dem vartebak va gazafa yasa darsafa gu bermaf rist ked.

Kotvielon parisik va lutsaga iegad. Wori lan dolesik va fela doden gan gazevik va warzot icde geja dakter. Louis XVI koe sogza va cenera ke francafa ervolia koe Valmy batinde zo givar. Gruper da va pomara ke preussenik ok osterik jontikedje goketer.

Koe Temple flint parvuon senuyun, Louis XVI gin vanpir opelafe yasafe gadikye. Va sutesa funtera ke nazbeikye stujer. Va kimeem ke utca ikarundayasa va winka pu ine nedir. Bak estu diepileksur ise enugur. Gazik estupur nime tupwertawer. Inaf biak dum tel ke stolenik tulukoptawer. Va jontika neva belir ise va Charles I gazik ke Engla bastakayan bak 1649 trakur.

Neken wan pokoler. Cléry zanisik va divuf warzot levgoler. In gruper da jontik krinanik ke Convention maga va gazafa yasa co djumumbed.

*Koe Temple flint, gazik va gaara va nazbeikye ektudar. Pomar enide bantel sutes gifunter. Louis va jontika neva belir ise va likera va malyesik egadar.*







# Jiz az xonuka

**21/01/1793**

**Gazik zo bastakar**



## **Convention maga :**

Bata maga ba 21 ke lerdaksat ke 1792 zo tadler ise vas 749 krinanik libuyun kare riwe tamef varos ruldar. *Convention* maga va Franca kali 26 ke saneaksat ke 1795 di boweyer.


## **Guillotine bastakasiko :**

Inaf yolt tir vey tel ke Guillotin selaropik tiyis krinanik ke Paris is ixuleyes va yazgara.

**B**ak santoleaksat ke 1792, *Convention* maga dakter da gazik zo rokomalyer. Krinanik va wazdexa va relmera ke Louis XVI lanedje kaaneyad. Koxakason va gazik, Gamain ludotasik va sintafa birga bilder ise va uta ke azilafa rastoka razdar. Koeon lo 600 valdig rotplekus va gazik zo trasid. Louis XVI tir drasuyus ! Wori viele ba 11 santoleaksat ke 1792 kak obla ke **Convention** maga awir, lo krinanik zo romplekud. Koe selusa amlitara, va lane yasagadikiye cuesine gan flint is plukera kosmad. Voxen battel yoltan gu Louis Capet gan malyesik va saura muon me grupartazukar. Jontik krinanik inc rabated da in rorotuxar. Viele marna ke azilafa rastoka zo atoed, pune dulzer : « Va batcoba metode grupelá. » Ton lok vas tanoy klap, krinanikeem va xonuka ke gazik bam klapar. Louis XVI ba ke taneaksat ke 1793 ba 10.32 b- kan **Guillotine** zo bastakar. Takrelon xonuker moida al suter : « Va gloga pu Lorik reduyus jovlé. » I gazik gu unaykafa kela zo kotawar isen mek sugawalk isu bore tid Maria Antonia arti aksattum moe kumba silukon di xonukeyer. Sinafe nazbeikye kaikanzane gan antiuca is stolera bak 1795 di awalkeyer. Ant nazbeikya ke Louis XVI rembliyir. Azen arti tol-sanda bak oxam 1814, viele Louis Stanislas Xavier berikye tu Louis XVIII zo sonayar, pune gire gazik ke Franca di tiyir !

*Moe Révolution viga ( Artowara viga ) koe Paris, Louis XVI bastakanon xonuker.*








# Ugalay



Louis XVI ton aboz ke sonara



Maria Antonia moe kumba  
zovdaks ke XVIII-eafa decemda

- 1754** Koblira ke Louis XVI.
- 1774** ( 10/05 ) Louis XVI va Franca kouskejar.
- 1776** ( 04/07 ) Volruptesuca ke Tanara-sokeem ke Amerika.
- 1778** Franca va kagluyasa bioga do Tanara-sokeem sugdar.
- 1783** Englik va volruptesuca ke Tanara-sokeem winugon kagruped.
- 1789** ( 05/05 ) Turunkara va Jadifa Soka koe Versailles.
- 1789** ( 17/06 ) Bareafa Soka wetce Tadlesa Maga va int etimar.
- 1789** ( 14/07 ) Vangira va Bastille ralma.
- 1789** ( 04/08 ) Tunera va gogoleem ke oluikem.
- 1789** ( 06/10 ) Jalmasik jupad da gazafa yasa va Versailles di jovler aze ko Tuileries berma koe Paris di koirubar.
- 1791** ( 21/06 ) Sopera va gazik koe Varennes viele in layateyer.
- 1792** ( 20/04 ) Franca va geja pu germanaf gindik dakter.
- 1792** ( 10/08 ) Galdanik ke winka is artowasik ke revava ke Paris va Tuileries berma dildud.
- 1792** ( 13/08 ) Gazik is yasa ko Temple flint zo stad.
- 1792** ( 11/12 ) Turunkara va jizara va Louis XVI.
- 1793** ( 21/01 ) Klibura va Louis XVI moe Concorde viga.
- 1793** ( 16/10 ) Klibura va Maria Antonia.



# Kotgrupaf korobik

- **Turgot** ( 1727-1781 ). Gedisik va Limoges mali 1761 kali 1774, Anne Robert Jacques Turgot va nuyotaf nelkoteem kiewatcon fosar. Radimion mali intafa koflira gu Jadif Stujesik va Sokerba bak 1774, va mil nelkoteem ko varafo gazaxo larewayar. Inafa fabdura swavon witapafa va gogolkirikeem kevon di vanmadayad numen bak 1776 gonogrifliyr.



La Fayette biptikye

- **Necker** ( 1732-1804 ). *Protestant* omeltik ke Genève, i Jacques Necker bak 1777 radimi titfira ke Turgot gu Sokerbafa elda zo kofliyr. Inaf munesteks bak 1781 va vrostagaf ixalareem ke aboyikeem basitalkar numaze gogriflir. Kan xuvara ke sane, bak 1788 gin zo rozar aze gin divflir aze ba 16/07/1789 bocon zo rozar. Tusaneapar voxe va bifeem me lajustujer nume bak santaneaksat ke 1790 va roti bulur.




Maria Antonia  
koe Temple flint

- **La Fayette** ( 1757-1834 ). Jotaf fayik, i La Fayette biptikye va volruptesa geja koe Amerika pakeyer. Jupayar da Louis XVI va vintesik lyumas va Engla di pomayar. Ton lujaf neyik ta rieteem ke Artowara, ba 15/07/1789 wetce dirgasik va Vedeyaf Suesikeem zo koflir. Va barksefaf erbilok to volmiv vanikatcur. Bak 1830 i bat gradilik ke nuyuca va korotira ke Louis-Philippe ( nafalik ke Franca wali 1830 is 1848 ) webepeyer.

- **Maria Antonia** ( 1755-1793 ). Nazbeikya ke Maria Teresa is Franz I gindikye ke Ostera, bak 1770 va Louis gazafe konolesikye kurer. Tir plabafa gu Artowara. Do Louis XVI radimi 10/08/1792 gu Temple flint zo kobuder. Gan Artowaraf Erkey zo xonukalanzar aze ba 16/10/1793 zo bastakar.



# Sareon gu Louis XVI



## Xadola

vergumveltafu bu, Paris, 1751, karba 1

## • Afiugalafa decemda

XVIII-eafa decemda gan yon gijaf suterotik isu trakopik dum Voltaire is Rousseau is Montesquieu zo yunkeyer, i gan ayik dem grabom koswavatas va artowasik. Albara va opeem va lan suterot konazbar, i va gijafa Xadola ke Diderot kabelcasa va varafa grupera va ugal. Dere dene yambaf ind, XVIII-eafa decemda va jontik tanuskaf grabom warzeyer. Va lingsik dum Watteau is Boucher is David rotozwat. Ayik ke bana decemda tiyid oklaf gu ugalara va dimwarzase sare ugale kottan trakuyur da ova is proyuca gu tapedaf poeem ke abdiugal kotvieli fu kevwad.



Kuncase ayikye ke wida ~ 1789


## • Tawadayik sareon gu Louis XVI

Tawamidusa kobara remi XVIII-eafa decemda abiceke abduxoar. Xekeem zo tukotunar ise va lotitsuyafa ziara. Irk artfiyis va Europa mal Amerika bak XVI-eafa decemda ko lok ke Franca bak XVII-eafa decemda zo galbur. Midura va tagra is dimeyaxa tukulasa va tawa nover da midusik va sid remi tanoya tanda fuxe tola ok bara guminjad. Midura va werna mali taneafu acku ke XIX-eafa decemda oxam zo voner. Dodafa blira koe wida vonewer. Tawadayik tulesutawed ise va aldo ke sangeem gogoden pu jiomik ik gertik ik gazik loloon tabid. Gazafa yega ( tisa fastafa kobara ) gan lana erbon gododena koayka zo ikaplekur.



- **Waniskafa fabdura**

Turgot va ristura va gazaxo toz tuwitar. Va gazafa yega is vertoteem funes va nuyafa pridura va denta koo gazaxo sular. Lafosayan fabdureem bak 1776 zo tuner viele Turgot gan gazik zo divdenar. Louis XVI va intaf eldik me nendayar.




**Vangira va Bastille ralma**  
Gretcaks ke bane sare

- **Bastille ralma**

Vegeduyuna bak gazugal ke Charles VI is Charles VII bak XV-eafa decemda, Bastille ralma va lamone is flint zanudayar lize gaderopaf stolenik zo kobudeyed. Sedme trakopik ke XVIII-eafa decemda, va varafa memaluyca ke belikafi roti leccayar. Bak 1789, vas peroy stolenik anton ruldayar. Koe izva ke Franca, kontel gis va Bastille ralma batkane va Paris giyir.

- **Grupeik is dritik**

Warzafa swava remi XVIII-eafa decemda galbuwer : opafa swava. To decemda tir ugale Benjamin Franklin is konak artan va kruldera ke tral kosmad. Lavoisier va witafa razopa redur ; Buffon tir sutesik va cugexafa *Tuwavafa Izva* ise va *Ruxafa Matela* grustar. Ware bak XVIII-eafa decemda, gedisik bowes va loa winka, va wita f vawaf gort kan yone warzafe ckane tene-kayane gan *Ponts et Chaussées* ristula volmiv senud.



**Gleba kev uja ke Riom**  
gan Nenon ke Nantes ( munesteks stakseyen pun Opaf Cultim, 1786 )



# Ugalda ke lane sare



**Klecaks. Batcoba tenuweter.**  
**Tawadayik zo lanzar**  
Gretcaks ~XVIII-eafa decemda

## • 13/12/1788 : Yarluca ke olk

« Taneafa lazava tir axaf warzeks ke retandafa warolara. Ina tiyir rotapafa eke koe lanyona kola, likam ke nivaf warolaks va sorla is olk anton zo kayestayar ; koe ayona kola, riwe mecoba ok dace mecoba zo kayestayar. Toleafa lazava : Muvacek is kentacek ke 1787, is onotcacek is rodcek bak 1788. Muvacek bak 1787 va fayara va pakap ke tawek weyonayad ; rodcek ke 1788 va kotrafa atrira ke dent me noveyer ; isen koe faytawaxo male darefa warolara, olk blokawer nume me welker ise me vonewer. »

## • Santoleaksat ke 1788 : stilara

« Koe Abbeville, kun-tol-decitoy ik kun-alub-decitoy dodelik mea kobayas koe askedona mali kazafa bioga do Engla ( 1786 ) re tid sutarsaf. »



**Intanyofaxe ke Jadot weltikye**  
Gretcaks ~XVIII-eafa decemda

## • Twa ke Turgot pu Louis XVI ( 1776 )

« Meviele vulkul, gazarsik, da bak 1649 to axuca ke Charles I ke Engla va inafa taka mo zerd plekuyur. Jinafa kotafa djumera tir da rofoliyil da al wijiyyi isen nedine wupe tiyid korcafe. Galpé da ugal va jin me di tumalyar. »



# Icde Louis XVI

- **Twa ke Necker pu Louis XVI (1789)**

« Ax ! Gazarsik, to ware abic ugal numen kotcoba jiadanyayar : pokolé da va coba gildeyena icde sanegaf arienteem mea kotviele kalitil :« Mali konaka tanda va abica rifa kalafa vula anton dikiyi. » Va bata kaluca gin trasitil, gazarsik ; pojatal ; pu grupalbas vedey dirgal. Voxen bat kagrupes vedey men gruper, va rinafa varafa erava ta intafa tukalara. »



**Sopera va Louis XVI gazik is yasa koe Varennes**  
Artowarugalaf gretcaks

- **Daktera ke Louis XVI gazik gukoesa va francikeem bak inafa yatera kal Varennes.** Paris ba 20 teveaksat ke 1791.

« Tokcoba ke gazik ware zavzar, vaxe giopafa jidjara va gazuca ? Da bowera va gazaxo gijapafo is zolonapafo lion dam Franca kan mergileem tadlen gan Vedeyafa Maga ton sinaf ref tazuk co rotir, pune gazik me trakú. »

- **Gazik moe kumba va tari gukoer**

« Tí volgunaf gu dirbun gomileem neke fu xonuké. Va askisik va intafa awalkera ixé. »



**Louis XVI do Edgeworth movesik, 21/01/1793.**

Gretcaks ~ XVIII-eafa decemda.





Gadye, laninde, mejilon tir dofugik ke jinafa taneafa renara. Kre bristur, felbene da jinafa abditcuca laninde ok arinde tuacawer. Dun kivayar da ko nubeem ke ayikyaja co lubé. Tir valeaf grupeson da gan sintaikya zo rená. Anton astoleweter viele kosmatar da Marthe djusolkureter.

Gadya, ina, va cinafa skedegara lekuvon krafiar. Tir lickafa. Va Marthe kan iteem ke kevlik disuker. Krupter da Marthe tir volluntafe, mesonkeson da kota ayikya nope jinafa renara co sotir. Ostik loeke dam gadye va velark abdikereler. Destar da Marthe va int do pelfudik ke jinafa klaa rorotplekur. Ison, koe F- zo gaayar. Koe kotbata deorafa widava, vaxeda koe telyona dodelikafa, milafa skeura isu begardara sokernigud, liote dam koe winka. Voxen ison, vegunguca ke Paris va bet begard iku levaykara loeke tutestar. Kottan va intafa ema icdeon gogir. Acum, kire va fertikya dem sayakaf kurenik tikí, pune palik gransen gan dilintaf gadikeem abicabicon ilfid. Griawid ekekon : male taneon nazbeikye ke tegiv-sutesik, kale ironokon tele ke matelik. Gadya gan batyoni tegi zo duxar, i gan tegi nutisi brudira sedme jin. Krafiar da gan oviskikya zo gruspé. Cwe culimer da gadye va ina al razdar ise vol vofadar. Voxen malyedason da to gadye gotegir neke stivawer, ina amlitar.

Va kot mielcek dene Marthe tiskí. Ba sane bartiv is acku gilartlaní, aze ba alube ok teve gazdon mallaní. Va rebava mea vamoograblú. Va tuvel kan jinafa tselka fenkuckú ; voxen bata nuyalaca va vetcoyerapa ikadiner. Enide biota me di divmodar, pune va urifey gu kilta sielon anamplekú. Dimdenlanison, diregazdon deswá.

Deneon, metel va beta jinafa gracera vantrakur ; coba koe J- vol tir mila. Ixam konakedje, pilkotik is guazafa exoma kan kre itaja va jin krafiad, lowe dulzeson pu jinyona kiavara.

Gazdon, ba alube bartiv, vugeke loratason, dem perfejuleem bene nuba titlaní. Titeon kodiskí. Langazdon, koe fogelom va vrodbildesik gamdá. Va bor dem vrod bene nuba gir ; jin va perfejuleem. Ton eaftafa kicegara gazdakiavar. Marthe di zo tazdar. In kotliz koe J- fu vaon galbur. Gan jinafa kipeuca loeke zo naké. Va amlitara ke vrodbildesik efe rolusté, voxe agié kire me grunarté.

Bak kielcek, pu Marthe vaon vol rovekalí. Ostik, bata zixa tir mefavlafa kiren Marthe ixam tir rotplekuyune. Batcoba to jontikedje tir. Nisu va ine wetce fertik pu jin abdi geltruca ixam al yofter. Mekon al vofav. Fure afton wiv. Acum lanviele va Marthe poiskafe trasí. Pilkotik su kalir da mali balemka va jinafa mallanira ba gazda pitcar. Taneon vol al djuprofolir, voxe re mea iltrakur. Bata guazafa exoma dem mawa valeve tela ke Marthe va lorara mielon is afizon askina temer. Marthe zo nolyer, djumallanir. Me gorav da icde kakevetca loeke di xeyuv. Pestev



volrotaskis : soaks re tir sopuyun. Bam Marthe va konakcoba evodayasa toz gildar. Antafa enrenonana nikya, i jotaf sverigik, pu inyona twa mea dulzer. Al ravé da daalasik ke bat yik va cin dablus koe impadimak lanviele al kozwir nume al pirdar da ina va Marthe mea di wir.

Askí da Marthe abdiplekur da ede betlize ont dene gadikeem ont kev kurenik kona piza co dilizeter, pune ine acutur. Dratcera ke pilkotik is kotu nisu askid da va nura wal Marthe is Jacques kiva ise belcon pokolé.

Marthe vosé da bak udorcek ke Jacques konakviele woratá, i ke Jacques ixam pulviyimb va jin. Vewá kire kiva da yordajatá ise va Marthe do beneon kaiktegise ayikye wití. Udorcek co tir santankaf. In rotir vurseter nume va mergil ta loa tolka trasitir. Askí da Marthe vogadar da pu jin vieleon suteter. Va barka ké aze laneteson va trasira va twa, den daykarafe piutexe laní. Balemoya ixam tigid. Voxen me rononarí : va tanoy adraf pilkomaf valdig grací. Tí voltrabiangaf kire va jinafa koblirafa maza al rotavé, larde favera va daykarafe piute mali sananyustdafa klaa anton zo sonover. Keve kuk karaké, djukabuson va culo ko iteem ke piuteikya is djukonarison va tweem inon gin nek mezilitin. Tere, larde koe piutexe zo grupecké, pune ledamon seotá da tweem den jinaf gadikeem direvielon zo stakseter.

Fotce, vanpitison ayikye, va jontikcoba ware fu gonaskí. Fenkuson va taneafa twa ke Marthe, nué inde ine va batmana sega fu skur : i va sutera va renatwa. Al vulkú da mek twind tir leon wavdaf : ant rena sotir adrafa. Krupté da kota twa ke Marthe tir mafelafa is bagaliafa gu telyona lolistafa twa ixam beliyina. Neken Marthe va unaykaca pu jin koeon kalir, is va rejdera ke blira sume jin.

Destá da jinafa lickuca me tir loeke bugdasa. Va Jacques wetce « kurenik » toz krafiá. Va inafa jotuca ilgrupé, va ine wetce guazik wí.

Pu Marthe me suté ; slika arpuma skre tid. Sopron tí kalackaf kire me gosuté, satoleson dum lente beta warzaca va klubafa kivara da me co rodefaskí isen jinafa twa va ine co lemisted ike co nutid opelkafa.

Jinafa frayera askir da arti tolka, iskedayason va tana twa ke Marthe moe azega, ina al griawir ; moe azega direvielon gin tigrir. Kosmara va bata twa va jinyon azed funer : va udorcek ke Jacques is jinyon tigris bartivap al impavantá enide va intikeem kobuivé da gu Marthe va int iliksantú. Kiren, beka taneon al sipoyú enide gadikeem raver da va fertik dikí, pune toz djumé da va lea wazdera dadir. Isen gadye va ageltucafa lazava ke jinafa proyuca to raver.

Va bati tci impavantá nume den zovdas cultim gin laní ; kiren, va lebaka vey Marthe malipon zovdá. Me grupé kase gadye diepiller ; icle va tankomuca ke jinyona tezikyá rovon destar, kan bask tukerawes va jin. Batdume den Grande-Chaumiére gin laní, kobapá, katanatason va konak remgudaks tori ark ke retanda, i va eksa tuwarzatana ba direfa worara ke kurenik.

Dere va René gin wí, i René divdenayane gu Henri-IV olda. Ine va Louis-le-Grand re nobar. Kotsielon banliz aneyá. Va sint palsezon nobav, kiren mali inafa divoldara gu Henri-IV is mali moekote Marthe, inaf gadikeem gelkeon torigis va jin gu tulanya, va jinafa dositara al zuker.

René torigir da rena koe rena tir tervasa tuksa nume va jin gu ske mu Marthe krander. Tabison va inyon vord, nyukon kalí da va enrenanik ae me dikí. Inafa mafelara va jin gelkeon tuaxaweyesa vere laumar.



Moe rena ke Marthe toz komodé. To getinesira va jinaf pesteem tir cugeke olyastera va jin. Jinafa ziadgera tir to tela ke klawusik a klawa, ok ke vikizasik a ruseta.

René va jinafa takra nuler, neke va yikya al duxiber ise reniskon forenar. Bata kafa sulemya, i latkaf espanik, va int iltazukar eke ape tir ke riva. René nujidewarur neke tir lickapafe. Kipeson is belcon tuzwaweson voser enide gu abigaca di zaná. Bata zanara, sedme bettan grupes va olda, tir ordafa rieta ke oldik. Djugruper kase battanya fu ortar. Batdume vofatason va ina gonabdugá.

Bata zanara va jin funer. Jinafa vazuca dimon tir cugafa. Voxen ika mecoba co djunuvelá vazaf, azen bexe bata weltikya va jin al grifuner. Va jin wilupon al abdugar eke jinafa vazuca gitatcesa va lancoba vox givebasa va arcoba levweyonar da va René is Marthe tarká. Icle djupopuvedé, voxe tí bro vikizasik giltis va tanoya sugduka. Kle anton sidjé da va René al ortá, beka al vogá da inafa fertya va kota abdugara dun beldar.

Tove Marthe, va meka sidjera satolé. Godefaskí. Kore unt kalí da vol ixeté ede co zo ortatá, pune vol lajupaskí. « Batcoba tir amidafa », va int skalé, ton katcalafa entuca sodulzena gan ketsuca. Milinde, dostecké da pu Marthe me suté, voxen ede ine pu jin me co suter, pune co krafíá da me renar. Neken, bata mesagacama va jinafa rena al laumasir.

Jacques va mecoba ke tila ke kurenik vangruper. Marthe, gitise kanespafe, va in me vanpulvir. Ede in erur : « Tokcoba tijir ? », pune ine gidulzer : « Mecoba ».

Grangier W<sup>ya</sup> va kimtaf Jacques konakviele nyaler. Gu volobliuca tove nazbeya kagar, ireglier da va ina al dozilir. Va laizafa betawera ke anda ke nazbeya gu bata volobliuca gar. Va dimon ina den int djuvedgober. Jacques xaar. Arti konak viel kaiki inafa artlapira, va Marthe den inafa gadikya dositar. Bantelya va inafa beta rintara derber nume va inafa rena mu jin mesonkeson bristur. Marthe koe bato yasaxo al koblir. Pu Jacques kalir da kota muka va kalaf ugal kimbar, ugale tiyir ke int. Koe intafa sardafa mawa gokeniber. Jacques va inkera va ilava mu int icle djumer. Nogla deonesir. Marthe vewar da bata ketafa mawa di zo kifur.

Grangier W<sup>ye</sup> torigir da bata werkaca tid solovafa. Grangier W<sup>ya</sup> impavantar nume pu kurenik is arnazbeikye da va ayikyafa gedeluca vol gildad. Zo derber da gloga ke nazbeya va Jacques abicote pasur. Kiren kotcoba deswana bas kurenik gan Marthe, pune Grangier W<sup>ya</sup> pu int gar, krupteson da inafa wegayera tid lugodafa. Mana ae tid, voxe mu jin.

Lanviele Marthe nuruyakoleper, pune djukudivlanir. Jacques grupecker da batcoba volto ta puvegura va dositara. Marthe va twa ta jinafe mane pu kontel me rotodiar, batdume ko kon piuteak miv plekur.

Va intafa amlitara ware loeke wauné, kire ede co rosuté, pune gu pwadera va inyona raplekuna nakera, mu kosik co maltegi. Dile gan intafa rotura zo kovudá ; arviele unt kalí da Marthe va Jacques gu gomilara estenseter, i gu inafa griketara abdi jin. Voxen larde ske cugeke sotupestakar, pune sopron wivé da gomesuté numen Marthe va Jacques wan piksesir.

In metakrelaf dimmallapir.



Kottel va nyatesa antiuca ke blira ke Marthe gu bata deona koridar. Kiren inaf gadikeem isu kurenik ant tid megrupes va cinafa skedegara ; nope tarkara va tantazukot, pilkotik va Jacques me rovegivad. Grangier W-ya ixam wiver da va nazbeya katrasir isen ina dum abdi kurera fu blir. Acum Grangier gadikeem vol gildar viele Marthe, ba direviel moi mallapira ke Jacques, dakter da koe J- gire fu soker.

Bak mil viel va ine gin wí. Taneon tulwon buzegá kiren ine al tir ikorapafe. Voxen viele va taneafa twa ke Jacques belí, pune ve radeyé. In kalir da va xonukera co malnalenyer ede Marthe mea co renar.

Va itura me dimaotcé. Fogetí blodaf gu awalkera, vukuson da al galpé. Loeke tumerogildanawé ise tuvolmalyawé. Betliz rwodev, pune kon bakaks nediwer. Kore Marthe dun kalir da vode va pokolera ke Jacques mea derbev nume tiv leeke volayaf, pune to jin vebá da zijnon di dulzer. To jin va yona antafa krenugafa twa inon kazawatana pu inafa kurenya dukalí. Marthe astoleson suter, boreson, voxen dratcé da mevielu woratá ede me vegecker. Jinafa sidjera zo tuaxar kire megrupeson Jacques va intyona antafa daava gu jin danur.

Oye pokolera div kota inafa twa dulzesa pu telyona cinafa, wí eke inafa djuksera tir enwelmafa.

Va intafa tila tove kimtaf Jacques mafelá, solve nope ketsuca tegí, is vol djupopatasen va gomil bene jiluca.

Kalafa rekola va piza radimifir. Kaxe, pestalera va abdaruca lapter. Tir vey jinafa klaa is jinafa etseriuca. Tí kuranaf ta mecoba, mei ta otcera il Marthe rotir ilgrupetese va jin num dimon kofitise va goni, mei ta platira va Jacques ko xonuka. Numen cinafa tanuca tir stopre dili, i stopre dimlapira ke ervolia. Ede in va kurenik co aloyatar, battode ine do jin co zavzagitir. Ede in co kevsutur, bantode pestalé da va ine poason vol co rodedimnarití. Cinafa kaluca tir bixeberma. Voxen batlize, larde krayta milbartivon sometir, pune pokolé da cugeke gaveon ticitir.

Re, to Jacques mempen va Marthe gu inafa gadikya kevrojur, i gu gadikya mevaleafa gu gire sokera koe J-. Ison bati tegi do lana eeftuca va abica uculera dene Grangier W-ya al divmodar. Arcoba nutir tubizafa : Marthe va kwik vol djukudikir, bilton gu intafa yasa is ware loon tela ke argadikeem. Voxen va tokcoba gadikeem is argadikeem kev Jacques co rotaskid ?i kev Jacques vanpiyis vangluyanik tuke yona lazava jinon zilina kan Marthe.

To bam J- va ine toz viltar.

**Oretlik koe alto**, ke Raymond Radiguet ( 7-eafa zixa ; diza titisa koe diref otuk )

Oretlik koe alto : berpot (1923) ke Raymond Radiguet francaf suterotik  
*Xanto : Le Diable au corps* francavon, kalkotavayano gan Laurent Lermigny, 2017.  
 Dotay : Kotavaxak dem Suterot.

Robelin banliz : <https://fr.scribd.com/document/358060704/Oretlik-koe-Alto-ke-Raymond-Radiguet>





## GARTOL

### AMERIKAF GARTOL

*Bison bison*

**Veem** : Carnivora

**Yasa** : Procyonidae

**Lum** : rane vas 1.90 m- ( metsa )

**Aldo** : mon 1000 kg-

**Talgeem** : 32 talga

**Nazbarugal** : Teveaksat ik

anyusteaksat

**Ocagugal** : 9 aksat

**Occek** : 1 oc

**Ikralukruca** : 2 tanda icde gartolya,  
vox loon icde -olye

**Gartol** ape tir jaftoldunol tel lopilkovaf gu kor. Inaf abdueineem tid logjjarotipaf loon dam radimeineem. Beweem sotir pockaf is mialukon abrotcaf. Taka nutir pinafa va trelaf noleem dir, i va nola pinafa loon dam kotar jaftoldunol. Im tir vaf is tibutaf is abrotcaf vas 50 cm- bene lentak ke aldo. Taka is iteem kake tec kograf baynuk griawid ; lukast bene itowa az tec trovgaf yinaxot kalleve titesoa tid. Abrotcaf im ke lentak va abdueineem dere besar, zovdason va teca nyudafa rija. Ault tir trelaf loon dam kotar jaftoldunol is dem mitca kalvamoe altev.

Abdi europafa boniara, amerikaf gartol moe riwe varafa Lenteamerika male Rocky rodega kale ronefa krimta is valentu Kanada kal Mexika. Batugale va in koe jontik amerikaf is kanadaf gerd rokakevet radimida riwe zo awalkopeyer : inafa ota vion ginal tadler.

Gartol ke azeka va werdek is webek dalon malestur ; voxon aalaf gartol va toa is geilt is gamama is almuk malestur ; tod enja, va tij is berdava rovo-malestur. Va lava dun olegar kore va nolda fentugalon grumalsaver.

Seltafa grustara ke gartol tir milapafa gu tela ke aryon tollubekdunol blis koe fenkunafa anameda. Gartolye tir antiafe oke dene kaelafa milkavama cane gartolyeem blir.



▲ Amerikaf gartol ( vamoelon ) isu europaf tid antaf govitaf jaftoldunol ware kruldes moe bata toloya tadava. Toloya katca riwe griawiyid voxex bexe zo lajugiwayad nume batugale zo nendayad. Tcabanera is kimikafa tadura va sina riwe kotron awalkopeyed, numen toloya amerikafa apta isu tanoya europafa areldon griawiyid. Amerikaf gartol koe werdxo is aala belcon blir, solve europaf gartol koe aala anton blir.



◀ Bak olgalicura va amerikafa talteka, stakera va gartol cugeke tiyir. Gartol kou pokolapise kelotafe omaze dace zo zeltayad. Bata stakera va zelara va mivirubik gu dalaf atelaf tor nekiyir.



Gartolya dene milkavapa dem oceem is melukrafe gartolye blir. Milkava axon tir tananafa numen bewik va volnik voldum tulon afrikaf ayadol me vukted. Antafi nutisi tiki tid yasafi tiki ; icde arak olkafa skeda tid ordon ardilafa. Jadion milgafe gartolye va kotar gartol sofelir isen aptolaf ardil ke gartolyeem krulder lize gadikya va megadafa gartolya kofelir : gartolya kare klaa ke inaf oc tirkarur : va emanya ba divadomtara ke oc drasur.

Lozolonafa kabelcara bak kwantugal tazukawed. Milgafe gartolye bam tukioxawed ise dun budad nume iniasotceson vajiked ; nekev rojuxa ke oriapa besanafa gu vaf baynuk is metrelaf inieem va sint lajubakad.

Izva ke europaf gartol ( *Bison bonasus* ) dace tir kimtafa loon dam tela ke amerikaf kosayik. Ban tir lodontinaf ( vas 2 m- tice metsa ) isen ge tir azekafe loon dam tele ke amerikaf gartol, voxen aldo tid milackafo ( vas mon tanoy decitor ke milgafe gartolye ). In nutir lezegodaf isen im tir lodrumef isen noleem lod-abrotcaf : adim tir ordon jaftolaf loon dam amerikaf kosayik.

Europaf gartol ixam tiyir riapaf titi XIX-eafa decemda larde koe antafa gola ke Bialowieza koe Polska is rossiafa gola tite Kavkaz rodegan wan lapteyer. Bak Savsugal, gartol va aalxoem ke zakodafa is fentafa Europa webeyer. Bak skaltugal nekin gan Taneafa Tamavageja ke 1914 ik 1918, yon ironokaf decemoy gartol zo stakeyed : tuke anton olkik videyen koe sulemxo, katca di zc lajugiwayar aze gu tuwava zc koplekuyur. Batugale mon decitoy gartol koe tuwava blid.

Bata toloya gartolafa katca sotid kosayapapa : batdume seltafa grustara ke europaf gartol tir milapafa dam tela ke aalaf amerikaf gartol kore lum ke milkava tir lopinaf. Ocagugal vas mon lerdoy aksat jijar azen tanoy oc cugviele di kobliir.




▲ Gartol tir rilitackaf dunol : kobliira ke gartoloc tir sumpara



▲ Fentugalon, trasitison va sinka, gartol lev nolda gojoxar.



▲ Bak kwantugal, milgafe gartolye va sint kioxon moliked.



▲ Europaf gartol ( *Bison bonasus* ) tir biwe logijaf vox lezegodaf dam amerikaf gartol. Griawiyis ton govitaf sok moni 1920, vey kros videyen koe sulemxo bak XIX-eafa decemda gire zo koplekuyur. Va toa ke waniba isu kumpia jontikote malestur

◀ Refo ( 1 ) is darefo ( 2 ) tigixo ke amerikaf gartol ( *Bison bison* ). Refo ( 4 ) is darefo ( 3 ) tigixo ke europaf gartol ( *Bison bonasus* ). Turunkara va remamerikaf kelot bak 1869 koe Tanarasokeem va gorukafa towara ke gartol koe Amerika yordayar. In riwe kotron zo awalkopeyer. Bak 1907, tuwavaxo ( poke Wichita koe Kansas galdolk ) bocon zo reduyur enide in diliodon di rovonzabalker . Nendasa sabega wali 1915 is 1920 adre zo tupoyad. Azon konako tuwavaxo koe Tanarasokeem is Kanada zo inkeyed. Europaf gartol titi XX-eafa decemda dere riwe griawiyir. Batugale mon decitoy gartol koe Bialowieza vedeyaf gerd koe Polska blid.



## TELIZ

2<sup>e</sup> bu : Louis XVI gazik ke Franca

40<sup>e</sup> bu : Oretlik koe alto, berpot

42<sup>e</sup> bu : Gartol

44<sup>e</sup> bu : Kuda ke Aisopos

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

## Kotavusa virda

Virda kotavon sanelayana, nuyon is faston  
romalvajana is rorubiana is rotanamzilina.  
Ickriluyun rokeem. PAG / DE.

Internetxo : [www.europalingua.eu/KotavusaVirda](http://www.europalingua.eu/KotavusaVirda)

Bu : [www.europalingua.eu/KotavusaVirda/18-e\\_otuk\\_04-2024](http://www.europalingua.eu/KotavusaVirda/18-e_otuk_04-2024)

Sanegara : Balemeaksat ke 2024. 18<sup>e</sup> otuk.

Yunkexa is ewava : ewaveem abugaf gu roka ok  
nuyon rotamuzen ok rictayan gan digisik.

4

Loma  
AWALKEXIK

NUYUCA



**Jan Palach**  
(1948-1969)

Jan Palach tir cesko-slovenskaf vayasik va int teyvikeayas ba 19/01/1969 koe Praha kevotceteson va tupreksara anamstegenan gan Sovietafa Tanara is ervolieem ke Warszawa Diliuk moi selura va **Praha Imwugal.**



Tir tana leca ke acagira va doeava is sovietafa kerelera.  
Toloy ar jotaf ceskik, i Jan Zajíc is Evžen Plocek, va inafa tula vanion sopuyud.

Vasil Makux - Nhât Chi Mai - Homa Darabi -  
**Jan Palach** - Bobby Sands - Mohamed Bouazizi

## Deaxol is astol

Ayik va deaxol is astol sinkar. Okie deaxol va astol tudjumasar kire in zo gigestursur. In kalir :  
« Wal gotacena gatcewa is yon goburen porn, rinafa blira tir teniskafa olyastewera. » Aze pirdar da in va kilandruca jidjar ise ta tildera ko fe ins luber. Va pirdara tarkar, ins luber nume va varafo alto lupur. Feliik va sulemkurmik tagar, va wayot tori bakanik erur. Sulemkurmik va koplekuks ke deaxolaf riz savsuter ; bat wayot va in dimon tugalesitir. Acum deaxol ta fraskera va astol di zo vikear.

Bettan kev artan nyagon levtiur, pune sovanpir taneaf askisik va intafa volkaluca.

Kuda ke Aisopos, -VI<sup>eafa</sup> decemda ( kalkotavaks gan Yurani Andergan )